

## Pinadesi, CHinátsaga, Hinemlo' yan Pás

Tinige' Rosa Salas Palomo

Fibreru 2021

### Pinadesi, CHinátsaga, Hinemlo' yan Pás.

Tinituhon gi i dos mit bente gi i Mátso i hinatmen i peste Covid-19 gi i tano'-ta.

Despásiónñaihon i minalángu yan finatai gi i manlátaftaf na mes siha.

Despues di i tiempon somnak mampos ha tátme hit ya meggai na minalángu yan finatai.

Ogga'an, talo'áni, puengi, tátalo' puengi, yan chatangmak.

#### I Pinadesi

Ta padédesi i peste Covid-19 nu atdet yan táyá' ánte-ña.

Táyá ha eskókohi – parehu manámko', manhoben, manmalángu yan mambrábu.

Ta pongle hit gi i gimá'-ta, ta bossat i pachot-ta yan gui'eng-ta, yan sesso ta fa'gási i kannai-ta.

Manmapribini hit na u ta fanábista yan todú i tiempo ta fansais pie na destánsia.

I etmás na'piniti na pinadesi i ti sumiña hit bumisita i malangu-ta yan humáfot i matai-ta.

#### I CHinátsaga

Manmahuchom i eskuela, fañe'cho'an, guma' Yu'os, gubietnamento, yan tenda siha.

Ya ti u fanmababa astaki tumungokñaihon i minalángu yan finatai ginen i peste.

Ya annai mababa i tenda yan bångko siha ná'manman sa' gof anákko' na fila.

Manmalingu cho'cho' palu gi i taotao-ta yan kontodu palu i liheng-ñiha,

Táyá' cho'cho', táyá' saláppe', tumáyá'ñaihon lokkue' liheng yan néngkanno' siha.

#### I Hinemlo'

Mañásaonao médiku, emfetmera, mamfáfa'che'cho' espitát, polisiha, sendálu yan taotao kimason, I Méggagai na taotao manná'huyong bossat, makloráksi na saosao, yan hånóm atkahót.

Motmot na minalángu gi i dos espitát ya ti numahong kátre yan mákinan humágong.

Mansen yáfai i maná'ante siha – ti nahong kánnai lao sigi ha' mo'na kada ora yan diha

Astaki dumespásiónñaihon i minalángu yan finatai yan manmabakuna i taotao siha.

#### I Pás

CHinacháláni este nu i manmababan i gima' Yu'os para u ta fanhosme misa.

Manmababa lámeggai na bisnes, setbision gubietnamento, tenda, yan eskuela,

Manungokñaihon i minalángu yan finatai yan lumibrenñaihon i dos espitát-ta.

Guaha inayudan néngkanno', saláppe', ginima', yan Covid-19 testing,

Sen sinague lokkue' nu i ma'apreban finatto, yan binakunan Covid-19.

### Pinadesi, CHinátsaga, Hinemlo' yan Pás.

Hunggan, magáhet, gof makkat i maloffan na sákkán bente bente

Lao, komu taiguihi yanggen mampinakyó hit atdet pat ha fána' hit háfa na ira,

Siempre manmanáyuyot, manmanosge, manmesngon, yan maná'ayuda.

Sa' metgot i tinangá-ta yan hinengge-ta gi as Saina-ta na u funas i Covid-19!